



Kamis, 28 September 2023

Ogen: Amos 7: 10-17



Labo Nabi biasa



Tepet jelma pasti nandai kerna rasa iri. Ntahsa pernah ialami ntah ngenehen kalak saling iri hati sada ras si debanna. Engkai kalak iri hati nandangi kalak si deban? Jabapna erkiteken iri hati nggo lit i bas genetik manusia. Iri hati memicu manusia guna lebih asangken kalak si deban. I bas tradisi filsafat Eropa Abad Pertengahan ras iri hati salah sada dosa si mbelin. Sabapna ibalik rasa iri lit perasan merawa, cemas ras sidebanna. Rasa iri turah asum kalak ngenehen kalak sideban ulin, hebaten asangken ia subuk i bas ekonomi, jabu, prestasi ras sidebanna. Adi la ikelola alu mehuli rasa iri banci njemba kalak ngelakoken si jahat. Rofl Haubl, peneliti arah Universitas Frankfurt Jerman ngelakoken penelitian kerna iri hati arah kuesioner si isebarna man 2500 kalak i Jerman. Arah penelitinna teridah maka buen diberu ngenanami iri hati adi iidahna kalak si deban lebih berhasil asangken ia. Dilaki pe seri aminna pe jumlahna sitik tapi alu tingkat iri hati si lebih mbages. Ia mbagi dua jenis iri hati. Pemena, iri hati si menginginkan kegagalan kalak si deban. Sumber arah iri hati enda e me kebencian, kebiaren ras kesedihan. Peduaken, iri hati si berpijak man keadilan e me penjemba guna nciptaken keadaan si lebih adil man kerinana labo terjeng man kelompok elit ngenca. Tapi lepas arah sisi positipna, rasa iri tetap jadi sada bentuk kiniseran. Ia menciptakan rasa kesepian, stress, depresi ras sidebanna. Rasa iri negatif tercipta i bas diri Amasia nandangi Amos. E maka ikatakenna man raja Israel kerna kai si ibelasken Amos man raja e. Alu idukung raja maka Amos banci ipelawes i bas Israel nari janah ernubuat saja ia i Juda. Tapi Amos si ipengaruhi iri hati si positip, si erjuang nandangi keadilan i Israel nurikensa man Amasia maka ia labo nabi biasa si erdahin guna ndatken upah. Tapi ia nabi si luar biasa si langsung ipilih Tuhan jine guna ernubuat nandangi bangsa Israel. E maka langsung itultuli Amos Amasia kerna kai si nandangi jadi man dirina ras jabuna.